

UYO UWEM
John 6:22-65
QYQHỌ UKPEP-ŊKPỌ 94

Eke Mkparawa

IKỌ IBUOT: “Jesus ọdọhọ mmọ ete, Ami ndi uyo uwem” (John 6:35).

Ndiyom Jesus

Ke ini Jesus ama akada utibe usuñ ọbọk tọsin owo ition ke uyo ition ye iyak iba, onyūñ ọkọk mbon udọñọ, Enye ama anam otu owo enyọñọ. Enye ọnọ mbet Esie uyo ete yak mmọ ebem Enye iso eka ke edem Inyañ Galilee oko, ke ini enye ọkọsuhọde ndibọñ akam. Nte ofim ye mbufut mmọñ esuk etopde ubom emi mbet ekewatde, Jesus asaña ke enyọñ mmọñ etiene mmọ. Enye anam ndik mmọ ye oyobio etre.

Ke ndań-nsiere, mme owo ema efiak eka ndiyom Jesus. Mbet ema ekpọñ ke ñkukure ubom emi okodude, edi Jesus ọsuhọ man ọbọñ akam. Mme owo ikọfiokke ite ke Jesus ama aka etiene mbet Esie onyūñ okodu ke edem inyañ oko. Mme ubom efen ema eto ke Tiberias edi; ndien sia mme owo mikekemeke ndikut Jesus, mmọ ema efiak ekeduk ke mme ubom man eka ke Capernaum, ebiet iduñ Jesus (Matthew 4:13).

Ke akpatre ke mmọ ema ekeikut Jesus, mmọ ebup Enye usuñ nte Enye akasañade osim do, sia mbet ema ekemen ñkukure ubom emi ọkọsuhọde, ndien ama oyom usuñ eti-eti ndisaña ñkanare inyañ oro. Okposuk edi nte mmọ ema ekeikut mme utibe-ñkpọ emi Jesus akanamde ke usen emi ekebede, mmọ ikotimke ifiok odudu Esie.

Ini enye emi, Jesus ikadaha udia ikpọhidem ibọk otu owo, edi enye ọtọñọ ndikwọrọ ikọ nnọ mmọ nnyuñ nnọ mmọ udia eke spirit. Enye ama ọfiok nta emi mmọ eketienede Enye. Ikedighe koro enye ekedide Eyen Abasi. Ikedighe koro mmọ ekeikutde mme utibe-ñkpọ emi Enye akanamde ekenyūñ enimde Enye ke akpanikọ, edi koro Enye ọkọbọkde mmọ tutu mmọ eyuhọ.

Nsinsi Udia

Jesus ama asua ọnọ mmọ koro mmọ ekekerede ebaña mme ñkpọ uwem emi ikpọñ, onyūñ etiñ ọnọ mmọ ete yak mmọ ebiat ini mmọ ke ndida nnam ñkpọ ñkañ spirit, emi edibighide ke nsinsi. Kpukpru usen, iban ye iren enam utom eyom ñkpọ isọñ emi edibiarade. Mmọ ebiat ediwak ini ke nditọ, ndidep, ye ndinam udia, emi mibighike. Ke ini ediade enye ọsọp okure, mme idighe ntre, enye abiara. Ekeme ndinim udia ke ekpri ini oto ke editim mkpeme, ke ndisin ke tian, mme ndisin ke ekebe-ntuhube. Edi etiñ enọ nnyin ete ke oto ke usuñ emi enamde udia ebighi, ebiat ndusuk ufọn emi edude ke esit. Mmọ emi ekpuhọrede udia ñkañ spirit oto ke mme ifiok owo, ebiat ufọn esie ñko enọ mme owo. Nnyin iyom Ñwed Abasi etie kpa nte Abasi ọkọnọde enye; nnyin iyom enye etie nte ekewetde enye ke eritọñọ emi mitoho erikabare eke ifiok owo.

Jesus eketiñ abaña udia ñkañ spirit emi mikemeke ndikure mme anyan ini ndibiat enye. Edinọ esie inyeneke adaña. Ke ata ediwak isua, mme owo ema etabi, enyūñ eka iso edia enye ediwak-ediwak, enyūñ edu uwem ke spirit, edi idaha esie kpukpru ini osuk edi ukem-ukem. Ikọ Abasi idighe ndibighi ikpọñ-ikpọñ, edi enye ọnọnọ mmọ emi ediade enye uwem ñko. ‘Koro Abasi akamama ererimbot ntem, tutu Enye osio ikpọñ-ikpọñ Eyen emi Enye obonde ọnọ, man owo ekededi eke ọbuqtde idem ye Enye okutak, edi enyene nsinsi uwem’ (John 3:16).

Edinam Mme Utom Abasi

Jesus ọkọdọhọ ete ke mme owo ikpanamke utom iyom udia ikpọhidem ikpọñ, edi ke ekpekam enam ndibọ udia eke spirit. “Ekam ebem iso eyom Obio Ubọñ Esie” (Matthew 6:33). Mme owo ema ebup se mmọ ekpenyenede ndinam man mmọ enam (ndida ndi mme ndinam) utom Abasi. Jesus ọkọbọrọ ete ke ndinam mme utom Abasi, owo enyene ndinim Enye emi Abasi ọkọdọñde edi ke akpanikọ. Nso utọ ndudue ke ndusuk owo esinam koro owo mikemeke ndibọ mme mfọn Abasi mme ndiduk ke Heaven nto ke utom esie. Ekọm-urua emi edade eduk edi ukem-ukem ọnọ kpukpru owo. “Koro ke mfọn ke ema enyaña mbufo oto ke mbufotidem; erinyaña emi inyūñ itoho mbufo; edi Abasi ọnọnọ; itoho se mbufo enamde, mbak owo baba kiet edibure mbure’ (Ñwed Mbon Ephesus 2:8, 9).

Mme Oyom Idiño

Mme owo oro ema efiok ete ke mmọ ekpenyene ndinim Jesus ke akpanikọ, edi mmọ ema ebup idiño man mmọ etim efiok ete ke Enye ekedi Enye emi Abasi okosiode ọdọ. Nso efen ke Jesus akpakanam? Enye ama ọkọk mbon udọ, ama anam oyobio odop, onyū ọbọk otu owo ke iso mmọ. Anie, ke ebede Eyen Abasi ekeme ndinam mme oruk nkpo emi? Ndusuk owo mfin ke eyoyom idiño eto Jesus, ke ini mme odu uwem idiño eyohode ke kpukpru ebiet. Nditọ Abasi kiet-kiet edi idiño odudu Jesus, ndien kpukpru ikọ ntiense enyū edi idiño mme utibe-nkpọ Esie. Ediwak idiño edu edieke mme owo ekpeyomde ndikut nnyū nnim ke akpanikọ, mfin ye nte ekedide ke ini utom Jesus. Ediwak owo enyime ndibọ uñwam ikpohidem emi midibighike nto Abasi, edi ekpri ibat owo enyime ndibọ mme edidiñ eke spirit.

Manna Ke Akpa-utatan

Otu owo ema eti nte Jesus ọkọbọkde mmọ ke usen emi ekebede; ndien edi akpanikọ nte ke mmọ ekeyom uyo ye iyak efen; koro mmọ ema edọhọ Jesus ete ke ema ebọk Nditọ Israel ke akpa-utatan (Exodus 16:12-16); ema enọ mmọ manna, uyo emi otode ke Heaven (Psalm 78:24, 25). Mme owo emi ema etre edikut se manna ọwọrde. Se mmọ ekeyomde ekedi udia man eda esuk biñ ke nkañ ikpohidem; edi mmọ ema esin udia eke spirit.

Jesus, Ata Manna

Nte Jesus ọkọtọnde nditiñ ikọ nnọ mme owo, Enye ama owut mmọ se Enye ekedide ọnọ mmọ ye se Enye edide ọnọ nnyin mfin. Ikedighe Moses ọkọnọ Nditọ Israel manna, edi Abasi ọkọdọ edi. Kpa ye oro, nkukure se manna akadade ọnọ ekedi mbiet ata uyo emi Abasi ọkọnọ edi (John 6:32). Nditọ Israel ema edia manna, edi ke edikem ini mmọ ekpaña. Idahemi Abasi enyene uyo emi ọfonde akan, koro ata Manna emi otode Heaven ọnọnọ uwem, oro edi uwem eke spirit (John 6:49, 50).

Mme owo oro ema ebup ete yak enọ mimọ uyo eke edinode uwem. Ndien Jesus etiñ ọnọ mmọ ete ke Imọ idi ata Manna oro, Uyo emi otode ke Heaven, me udia eke spirit (John 6:51). Mmọ ikekemeke ndifiok se oro ọwọrde. Mmọ ema ebup ete, nte emi idighe eyen Carpenter? Ndien nso idi ntak emi Enye ọdọhọ ete ke Imọ ito ke Heaven? Enye ama ọdọhọ ete ke obukidem Imọ ekedi Uyo. Mmọ ebup ete, didie ke mme imọ ikeme ndita obukidem Esie?

Ikọ Edi Se Eyomde

Jesus aka iso etiñ ọnọ mmọ abaña udia ukpọ. Ke John 1:14, nnyin ikot ite, “IKỌ akabare edi obukidem, onyū oduñ ye nnyin.” Nnyin ikot Nwede Abasi, IKỌ ABASI. Jesus ọkọdọhọ ete ke mme ikọ emi Enye eketiñde ọnọ mmọ ekedi spirit ye uwem (John 6:63).

Edieke anade nte nnyin ita Ikpohidem inyū iñwọ Iyip Jesus, nnyin inyene ndida kpukpru Ikọ Abasi emi edide Nwede Abasi nnyene ke esit nnyin. Nnyin inyene ndinim enye ke akpanikọ inyū idu uwem ke enye. Udia ikpohidem emi nnyin idiade ọnọ nnyin odudu onyū añwam nnyin ndikori. Nwede Abasi anam kpa ukem oro ọnọ nnyin ke spirit. Man owo ekeme ndinyene uwem eke spirit, enye enyene ndinim Nwede Abasi ke akpanikọ, nnyū nnam se enye etemedede, nnyū nnam enye edi mbak uwem esie. Ke ini nnyin idiade udia ikpohidem, nnyin ita enye, enye ataha, ndien enye akabare edi mbak idem nnyin. Owo ekeme **ndise** okpokoro emi ọyohode ye udia, mme ndikama ndusuk ye enye, edieke enye midiaha udia oro idinamke ufọn inọ enye. Enye ekeme ndikpa biñ ke enye ndisin mme nditre ndidia udia oro. Kpa ukem oro, ke nkañ spirit, nnyin inyene ndinam Ikọ Abasi oduduñ nnyin ke idem man inyene ufọn ito enye. Udia emi (Nwede Abasi), edi se ebedede enim enọ nnyin. Owo ekeme ndituak nda, ese, edi akpa ke spirit, ke ini mbon efen esuk ebode erinyaña. Enye ekeme ndimen Nwede Abasi nkama ke ubọk esie nsaña, kpa ye oro, enye inyeneke nsinsi uwem (John 6:53, 58). Owo enyene ndinam se Nwede Abasi ọdọhode man omum erinyaña esie akama, kpa ye edibọ erinyaña. Owo aka iso odu uwem oto ke ndidia udia, ke spirit ye ke ikpohidem (John 6:57).

Kpa nte Nditọ Israel eketañde manna kpukpru usen (Exodus 16:21), nte owo Abasi enyene nditañ udia emi otode Nwede Abasi ke usen ke usen man ọnọ enye nsọñidem ye uwem ke spirit. Ke ini owo etrede ndidia udia ikpohidem ke usen kiet enye okop mmemidem ndien inyū itim inemke enye ke idem. Kpa ukem oro, owo Abasi oyom udia kpukpru usen. Iduhe owo emi oyomde ndidi mmeme mme ọdọhọ udọhọ owo Abasi.

Mkpa Ke Spirit

Ke ini Jesus ọkọdọhọ ete, ibohoke afo adia Ikpohidem Esie onyū ọñwọ Iyip Esie, afo unyeneke uwem ke idem fo (John 6:53), Enye okowut ete ke afo eyekpa ke spirit. Mme anam idiok-nkpọ ekpaña ke spirit (I

Ŋwed Timothy 5:6); edi ke ini mmọ ebọnde akam eyom erifen enyūn enimde Abasi ke akpanikọ, mmọ ikpaha aba edi edu uwem (Ŋwed Mbon Ephesus 2:1; Ŋwed Mbon Colossae 2:13).

Ke otu mmọ emi ekekopde nte Jesus ọdọhọde ete, “Ami ndi Uyo Uwem,” ndusuk ekedọhọ ete ke oro ekedi ọkpọsọn ikọ, ndien ke mimọ ikekemeke ndinam nte Enye ọkọdọhọde mmọ enam. Kpa ye ndusuk mmọ emi ekekotde idem mmọ mbet Esie ema ekuni ke mme ikọ Esie. Yak owo ndomo kiet emi okotde ukpep-ṅkpọ emi okutie nte mmọ, edi yak enye otim ekpeme mme ikọ emi: “Demere, afo emi edede idap, nyūn set ke mkpa, ndien Christ eyeyama ọnọ fi” (Ŋwed Mbon Ephesus 5:14).

MME MBUME

1. Anie edi Uyo Uwem?
2. Nso idi ntak emi ekekotde Enye Uyo Uwem?
3. Ekenọ Uyo Uwem oto ke mmọn edi?
4. Didie ke nnyin ikeme ndinyene Enye?
5. Nso ke Uyo Uwem edinam ọnọ nnyin?
6. Ikafaṅ ke nnyin ikpenyene ndidia Enye?
7. Nso itibe inọ mmọ emi etrede ndidia Uyo Uwem?